

Air pasang besar hingga Sabtu

BH 22/8/24 pg 14

Penduduk berhampiran kawasan pesisir pantai dinasihat berwaspada

Oleh Hamzah Osman
bhnews@bh.com.my

Kuala Lumpur: Fenomena air pasang berbani atau air pasang besar melanda beberapa lokasi di pesisir pantai di seluruh negara, mulai semalam hingga Sabtu ini.

Pusat Hidrografi Nasional berkata, seiring maklumat terkandung dalam Jadual Pasang Surut Malaysia 2024, air pasang besar itu boleh menyebabkan limpahan air ke kawasan daratan dan kemungkinan berlaku banjir.

“Susulan itu, penduduk berhampiran kawasan pesisir pantai disaran lebih cakna dan berwaspada berdepan fenomena ini.”

“Sila pantau keadaan cuaca semasa dengan merujuk kepada agensi berkaitan bagi mendapatkan informasi keselamatan kawasan pesisir pantai,” katanya dalam kenyataan dimuat naik pada laman Facebook rasminya.

Menurut pusat itu, orang ramai boleh mendapatkan maklumat lanjut mengenai paras pa-

sang surut air kawasan berhampiran dengan melayari <https://hydro.gov.my/ramalanpasangsurut/>.

Semakan BH mendapati kawasan Pelabuhan Klang di Selangor, menyaksikan air pasang besar mencapai paras lebih lima meter berlaku sekitar jam 8 pagi dan 10 malam sepanjang tempoh sama.

Lokasi lain yang dijangka menyaksikan air pasang melepasi paras tiga meter termasuklah Johor Bahru, Pasir Gudang, Kedah Pier, Lumut, Kemaman, Kuantan, Pulau Tioman, Mersing, Pending, Tanjung Manis dan Kuala Mukah.

Peka amaran bendera merah

Sementara fenomena air pasang besar selama empat hari di Pantai Chenang dan Pantai Tengah, Langkawi mengakibatkan paras ombak paling tinggi boleh mencecah lebih tiga meter.

Pegawai Pertahanan Awam Daerah Langkawi, Kapten Khairul Afzan Md Yasin, berkata pihaknya sudah mengarahkan anggota Angkatan Pertahanan Awam (APM) melakukan pemantauan di dua lokasi berisiko itu.

“Sehubungan itu, orang ramai dinasihatkan peka dengan tanda amaran bendera merah yang dinaikkan anggota penyelamat pantai di Pantai Chenang dan Pantai Tengah di sini, yang juga kawasan tumpuan utama pelancong.

“Bendera merah sebagai panduan kepada orang ramai supaya menjauhi kawasan berkenaan be-

JADUAL AIR PASANG BESAR

	Rabu 21 Ogos	Khamis 22 Ogos	Jumaat 23 Ogos
LANGKAWI	1.30 pagi (277m) 1.30 tengah hari (3.17m)	2.00 pagi (2.88m) 2.00 petang (3.14m)	2.40 pagi (2.91m) 2.20 petang (2.99m)
PELABUHAN KLANG	7.10 pagi (5.42m) 7.20 malam (5.21m)	7.50 pagi (5.56m) 8.00 malam (5.17m)	8.30 pagi (5.56m) 8.30 malam (5.02m)
PASIR GUDANG	1.00 tengah hari (3.03m)	12.40 tengah malam (3.34m) 1.30 tengah hari (3.08m)	1.20 pagi (3.39m) 2.00 pagi (3.01m)
LUMUT	5.00 pagi (3.14m) 5.30 petang (3.11m)	6.20 pagi (3.22m) 6.00 petang (3.05m)	6.50 pagi (3.23m) 6.50 petang (2.9m)
PULAU TIOMAN	11.20 pagi (3.11m) 10.30 pagi (2.33m)	11.50 pagi (3.02m) 11.40 pagi (2.51m)	12.10 tengah hari (2.87m)

rikutan fenomena air pasang besar dijangka berlaku empat hari mulai hari ini (semalam),” katanya dalam kenyataan, semalam.

Khairul Afzan berkata, paras air laut dikategorikan sebagai berbahaya dengan ketinggian ombak dilaporkan mencecah maksimum 3.17 meter menjelang jam 1.30 tengah hari ini, sekali gus tidak selamat untuk sebarang aktiviti riadah.

“Pengunjung pantai perlu lebih berhati-hati dan sentiasa waspada dengan perubahan keadaan persekitaran dan segera memaklumkan kepada anggota APM jika melihat kejadian boleh mengundang kemalangan,” katanya.



Khairul Afzan Md Yasin

Pengunjung berhati-hati melakukan aktiviti riadah di Pantai Chenang, Langkawi, semalam.
(Foto Hamzah Osman/BH)

